

*N:o 3 4<sup>to</sup> recedat* *N:o 1.*  
*2*  
Q. F. F. Q. S.  
DISSERTATIO HISTORICO-LITERARIA,  
DE  
**POËTIS**  
IN  
**SVIO-GOTHIA**  
**LATINIS,**

*Cujus*  
**PARTEM PRIOREM,**  
*Indulgente Ampliff. Senatu Philosoph. in alma*  
*ad Upsaliam Academia,*  
**Sub PRÆSIDIO**  
**VIRI CELEBERRIMI,**  
**MAG. JOHANNIS IHRE,**  
**Eloq. & Polit. PROF. Reg. & Skytt. S. R. L. M.**  
*Publicæ bonorum censuræ submittit*

**STIPENDIARIUS REGIUS,**  
**JOHANNES A. WILHELMUS,**  
**UPLANDUS.**

**In Audit. Gust. Maj. d. 2. Maji,**  
**AN. MDCCXXXIX.**

*Horis ante meridiem solitiis.*

---

**UPSALIÆ impressa.**

*N. M. W. W. W. W. W.*

VAI  
1506437

TRIGÆ FRATRUM  
*Generosissimorum Nobilissimorumque,*  
DOMINO  
LUDOVICO  
DE GEER,  
*Regio Cubiculario.*

DOMINO  
CAROLO  
DE GEER,

&  
DOMINO  
ANTONIO  
DE GEER,  
*Mæcenatibus Optimis.*

Q<sup>UOD</sup>.

EX. GENEROSISSIMIS. VESTRIS. NOMINIBUS.

MÆCENATES. OPTIMI.

PRÆSENS. DISSERTATIUNCULA.

LUCEM. AC. NITOREM. MUTUARE. SUSTINEAT.

FACILES. IGNOSCATIS.

SUPPLEX. ORO.

SVASIT. DICAM. AN. IMPERAVIT. HOC.

GRATIÆ. VESTRÆ.

AC.

BENEFICIORUM. SINGULARIUM.

MIHI. MEISQUE.

QUIBUS.

VESTRO. UTI. INDULGENTISSIMO. PATROCINIO.

JAM. DIU. LICET.

PRÆSTITORUM. VENERABUNDA. RECORDATIO.

CUI.

NIMIUM. MIHI. DEESSE. VIDERER.

NISI. HAC. OCCASIONE. DATA.

PUBLICÆ. TESTARER.

QUANTI. EA. FACIAM.

ET.

QUOD

QUOD. VIVAM. FACTURUS. SIM.

VOS.

VESTRÆ. TANTUMMODO. IN. NOS. GRATIÆ.

ADDITE. PERPETUITATEM.

EGO.

CUM. NIHIL. ALIUD. VALEAM.

CALIDISSIMA.

PRO. PERENNATURO. VESTRO. FLORE.

NUNCUPABO. VOTA.

*Generosissimorum Nobilissimorumque*  
*Nominum VESTRORUM*

*Clientis devotissimus*

JOH. A. WILHELM.

*Plurimum Reverendo atque Praclarissimo*

DOMINO,

**Mag. BERNHARDO**

**WÄNGBERG**

*Ecclesiae, quæ Christo in Fernebo Orientali colligitur, PASTORI Laudatissimo,*

*FRATRI longe honoratissimo,*

**S**I mihi blanda darent Sacratæ Numina montis  
Ore diserta loqui, Phœbumque æquare canendo,  
Aut saltem illorum sectari posse lepores,  
Quos mea jam celebres inducit pagina Vates;  
Nunc certe esset opus, Tua quo, suavissime Frater,  
Plurima commemorem benefacta & munera larga,  
Me quibus immeritum cumulasti mente benigna,  
Dum Patrio pro me gestisti pectore curas.  
Ast mihi dicturo doleo nunc verba deesse,  
Illa quibus digne referam: mihi namque videbor  
Haud nimium dixisse, ultro si, Frater amande,  
Multum confiteor tibi me debere salutis.  
Et quoniam nec te, nec carmine solvere possim,  
Semper ero votis pius & ditissimus ore,  
Dignetur, qui sceptræ tenet radiantis Olympi,  
Incolumem in Pyliam te conservare senectam.  
Omnigenoque bono semper mactare benigne.  
Interea lætus, quos jam Tibi sacro, Poëtas  
Adspice, quin etiam in solito persiste favore.

**Carissimi FRATRIS**

*observantissimus cultor,*  
**JOH. A. WÄNGBERG.**

VIRO- JUVENI

*Moribus & eruditione Ornatissimo,*

DN. JOHANNI WÄHLBERGIO,

De Poëtis Suo Gothiæ Latinis  
egregie differenti.

**W**ählbergi, spes Aonidum, quem non minus artes,  
Quam decorat pietas ingenuusque pudor.  
Quemque suum pariter Charities doctæque Sorores,  
Ha studio ast ille moribus, esse probant.  
Janne, quod optabam, gelido sub sidere natos,  
Haud tepido monstras incaluisse DEO.  
Nec solam Hesperiam Phæbo gaudere favente,  
Aut habiles fidibus suppeditare manus.  
Gratia Dis, nostro salit & sub pectore vena,  
Nec patrio torpent corda revincta gelu.  
Cernitur heic tergo Linschiöldius ore sonare,  
Cernitur & nitidum verrere Polus ebur.  
Aonia cecinit quod Bergenhielmus arte,  
Ipse, puta, vellet dicere Naso suum.  
Vos quoque Cotumbi, vacuum per nobile, docta  
Tuque Lagerlöfwi suspiciende lyra;  
Cur vestros gustare sales contingit, eodem  
Desumptos dicat, quo Cypris orta, mari.  
I nunc, qui Boream iusto frustraris bonore,  
Es Veneres ulla Arcton habere nega.  
Cum Gothicis compone Tuos nunc, invide, vates,  
Aut Phæbo iacta Te propiore frui.  
Nulli Helices certe vidi nocuisse rigores,  
Innumerus gravior Sirius esse solet.

festinanter applaudit

JOH. IHRE;

\* \* \* \* \*

**S**istuntur jam conspectui Tuo, C. L. *Poëta*  
 aliquot *Svio-Gothorum Latini*, non quo debue-  
 runt, sed quo a me potuerunt, nitore collu-  
 strati. Requisiverat enim nobilitas hujus argumen-  
 ti singulare ac Poëticis studiis, tum aptum tum ad-  
 suctum Ingenium, quod tamen utrumque penes  
 me desiderari, ingenue confiteor. Requisiverat  
 etjam collectionem adcuratiorem carminum eo-  
 rum: quam tamen in tanta eorum dispersione vix  
 obtineri posse, saltem obtentu difficillimam esse, utur  
 nulli pepercerim labori, satis expertus sum. Eorum,  
 quæ habeo, non possum non, qua par est veneratio-  
 ne, agnoscere, me maximam partem acceptam refer-  
 re debere favori ac benevolentia Archi Præpos. Lin-  
 cop. Graviss. Max. Rev. Doct. D:ni ANDREÆ O.  
 RHYZELII, & Bibliothecarii Acad. hujus Amplissi-  
 mi atque Celeberrimi D:ni ANDREÆ NORRELI,  
 qui mihi facilem aditum ad *collectiones Palmiskaldianas*  
 concessit, nec non Registratoris in Archivo S:æ R:æ  
 M:tis Regniq:ue Sveciæ Inclutissimi, D:ni ANDREÆ  
 ANT. STIERNMAN, qui, plurimis mihi literis dat-  
 tis, multa in hanc rem mecum benigne communi-  
 cavit; Ut taceam, quæ Celeberrimus D:nus PRÆSES,  
 tum ipse tum per alios huc maximo studio pro  
 sua humanitate, contulit. Si quosdam autem,  
 in priori hac parte ratione temporis commemoran-  
 dos, omisimus, eos posteriori, si DEO ita visum fue-  
 rit, inferemus, subjuncturi etjam catalogum,  
 quomodo se invicem subsequi debeant, ad-  
 curatius indicaturum. Vale!

# CONSPECTUS

## PROOEMI.

- §. I. *Exteros, qui de Poëtis Latinis tractavere, nostrates fere præteriisse, docet.*
- §. II. *Sequiora quorundam de ingeniis Borealium judicia expendit.*
- §. III. *Eadem strictim refutat.*
- §. IV. *Instituti rationem tradit.*
- §. V. *Quid antiquiora tempora in Poësi Latina præstiterint, narrat.*

## CAP. PRIORIS.

- §. I. *Ad recentiores pergit, & ERICUM SKINNERUM laudat.*
- §. II. *SYLVESTR. JOH. PHRYGIUM.*
- §. III. *JOH. THEODOR. MESSENIUM.*
- §. IV. *JOH. OL. STIERNHÖKIUUM.*
- §. V. *LAUR. OL. WALLIUUM.*
- §. VI. *ERIC. HAQ. ODHELIUM.*
- §. VII. *JOH. JOH. PRYTZ.*
- §. VIII. *ERICUM OL. LINDSCHJÖLDIUUM.*
- §. IX. *JOH. BERGENHIELMIUM.*
- §. X. *LAUR. JON. FORNELIUUM.*
- §. XI. *JOH. VIDEKINDI.*
- §. XII. *EMUND. NIC. GRIPENHIELMIUM.*
- §. XIII. *ANDR. LILJEHÖKIUUM.*
- §. XIV. *THOM. POLUM.*
- §. XV. *JOH. PAUL. OLIVENCRAINTZ.*
- §. XVI. *JOH. JON. COLUMBUM.*
- §. XVII. *PETR. LAGERLÖFFIUUM.*
- §. XVIII. *JOH. BILLBERGIUM.*
- §. XIX. *OLAUM HERMELINUM.*





## PROOEMIUM.

### §. I.



**Q**UI aliarum Nationum, ITALORUM, GALLORUM, SCOTORUM, BELGARUM, HUNGARORUM, ANGLORUM, GERMANORUM DANORUM-que Poëticas delicias summa cum voluptate manibus teris, B L, nostratum Vatum, non nisi exiguae molis *Prodromum* <sup>a)</sup> conspicias, dubius fortassis, gentisne incuria, an prudentia, honesto titulo penuriam suam occultanti, tam egregii operis intermissionem adscribendam esse existimare debeas. Vides etiam ADRIANUM BAILLETUM <sup>b)</sup>, dum mille & quingentos Poëtas Latinos variarum  
A
natio-

<sup>a)</sup> Editum Ups. 1722 laudatissima opera Viri Reverendiss. & Scarensum Antistitis Dn. Doct. PET. SCHTLLBERG Poës. tum Prof. Reg & Ord. Simile inscriptum fuisse Nobiliss. HERMELINI docet Holmia Literata p. 70. <sup>b)</sup> Jugemens des Savans Tom. IV. p. 611.

nationum recenset & expendit, de Poëtis Svecis nil nisi nudum titulum præferre. Vides JOACHIMUM FRIDERICUM FELLERUM *c)* Latinorum Vatum numerum inire adcuratum, nostræ nationis autem ne unum quidem nominare. Observas D. G. MORHOFIUM, quantumcunque nationi nostræ alias fuerit, dum in Polyhistore suo ceteros omnium gentium Poëtas Latinos laudat, nostros sicco pede præterire. JOH. PETRI LOTICHII Bibliothecam Poëtarum consulis, sed nullas ibi nostrorum imagines vides. — OLAUM BORRICHIIUM septem dissertationibus *d)* in lucem publicam editis Poëtas Latinos recensuisse nosti, nostratibus etiam usque adeo non fuisse injurium, quin in scenam nonnullos Poëtarum Svecorum induxerit; *e)* sed hos dum propius examinas, tales esse judicaveris, ut versificatorum nomen vix tuiti fuerint. Taceo LILIUM GREG. GYRALDUM, PETRUM CRINITUM & innumeros alios, qui vel data opera, vel etiam de Poëtis carptim tractarunt. Tu itaque, B. L., quid dicendum putas?

*Tamne aversus equos Gothico Sol vertit ab orbe,*  
ut nulla septentrionales hæ plagæ educunt Poëtica ingenia, & de Svecia nostra verum sit, quod de finitima Germania cecinit JOHANNES ANTONIUS CAMPANUS, Aprutini in Italia Episcopus? *f)*

*Nec faciles bederas, nec opacas frigida laurus*

*Terra gerit.* - - -

## §. II.

Sunt quidem quamplurimi, qui septentrionalium ingenia

---

*c)* In monumentis ineditis. *d)* Hæ Dissertationes multa eruditione referta, & junctim edita Francofurti Ato 1683 in 4:to, primam huic opella ansam dedit. *e)* Dissertat. ult. p. 163. *f)* Epist. p. 333.

ingenia tardiora venamque rigidiorē esse criminantur, quam ut ex eorum penu egregii quidquam proferri queat. Et in ea etiam opinione jam sua ætate fuisse ARISTOTELEM, acutissimum alias Poëtarum censorē, ejus scripta evincunt <sup>a)</sup>. Sed nescio sane, quid in suæ sententiæ robur hi viri adducere valeant. Nam si cæli genium, & ambientis aëris naturam consideramus, ille heic perquam tenuis deprehenditur, adeoque, si judicio CICERONIS niti velimus, ejusdem aëris puritati acceptum referenti, quod Athenienses aliis acutiores essent <sup>b)</sup>, secundum nostrates sententia omnino pronuncianda erit. Nec video, quid ex frigoris inclementia Svecorum ingenia præ ceteris detrimenti capere possint, quum alia omnia credere jubeant, quos in ceteris scientiis fecere maximi progressus, & in hoc etiam studiorum genere non solum finitimi DANI LETIS, BORRICHII, BERINGII ceterisque non inficiandorum nominum Poëtis superbiunt, sed apud PANNONAS etiam SARBIEVIUS BUCHANANO, immo ipsi HORATIO dubiam palmam reddere quibusdam censetur <sup>c)</sup>. Non itaque credibile videtur, solam nostram patriam natura usam fuisse noverca, & ipsa Boeotia, quæ tamen Pindari cunas vidit, infeliciorem. Et si ipsam nobis adversari naturam, si nostra ingenia alio rudioriq; luto circumdata esse, invidis largiremur, nova nostratibus non poterit non inde laus exsurgere, utpote qui velis remisque eo pervenerint, quo vix secundo naturæ ductu alii.

A 2

§. III.

<sup>a)</sup> Conf. BAILLET. Tom. IV. Art. 445. <sup>b)</sup> Lib. 2. de Nat. Deor. Idem etiam de boediernis prodit JACOBUS SPONIUS in itiner. Lib. V. p. 24. <sup>c)</sup> Vid. SEBAST. KORTHOLT, disquisit. de Enthusiasmo Poëtico pp. 39. 40.

## §. III.

Sed hisce nos eo minus innititur, quo certius est, eos nimium suis abduci præjudiciis, qui vel soli calique genio, vel astrorum influxui *a)*, vel temperamentorum diversitati *b)*, & variz corporum fabricæ, ceterisque causis naturalibus illa tribuunt in describenda nationis indole, quæ aliunde arcessenda forent. Mittimus proinde ista, & potius Viro summo, THOMÆ BARTHOLINO *c)*, adfurgimus, cujus verba nobis notata digniora visa sunt, quam ut heic præteriri debeant: Quamquam, inquit, non segnem operam sectionibus hominum brutorumque olim impenderim, Profectoresque per Europam maximi nominis viderim, hætenus tamen

*a)* Riso, quam resurrectione digniora sunt, qua JLLIUS FIRMICUS Lib. IV. Astron. Cap. 17. de hoc Astrorum influxu commentatur, fingens Poëtas, & divinis carminibus nobiles nasci, si luna defluens a Mercurio in nocturna genitura luminibus ad Mercurium feratur. Huic etiam sententia patrocinatur CASPARUS PEUGERUS in de variis divinationum generibus comment. p. 65. Postquam enim de natum cerebri ex seminibus & astris differuerat; Etsi, inquit, magna seminum vis est, non minor tamen est calis & astrorum, qua non solum cerebri crassi convenienter temperata, sensus acuiunt & vegetant, sed etiam temperamentis ipsis, certo postea, certas inducunt & acumen quoddam ad peculiaria studia, adducunt, Poëticen, Artem Medicam, atque alia hujusmodi imprimunt. *b)* Temperamentorum doctrinam majoris faciemus, ubi luculentius evoluta fuerit; interea, sive Melancholici, sive Cholerici ad Poësin aptiores sint judicandi, certo certius est, nullius temperamentis expertem Patriam nostram censendam esse, sed singula heic passim occurrere. *c)* In dissert. de libris legendis p. 36. editionis Menschianiana.

tamen nec lynceis oculis insignem differentiam in ceteris, corde, hepate ceterisque visceribus observare potui, nec observare aliis licuit, quæ Arabes, Græcos, Hispanos, Italos Gallosque a Germanis, Anglis, Danis, Svecis, Norvegis, Islandis & qui in ultima Thule habitant, si partium conformationem consideres, separent, ut ab eruditione & rerum bonarum vel inventione vel exercitatione, seu hi, seu illi, seu isti excludantur. Ad nos vero quod adinet, credimus nullum sidus Principum favore mitius esse, & ubi adsint MECENATES, non defore MARONES. Et cum ex nostratum historicis pateat, quantæ Principum domi militiæque, intra d) & extra Patriam e) deliciæ fuerint Poëtæ, & quot denique donis eos cumulatos dimiserint fieri nequit, quin ars tanti facta plurimos omni tempore habuerit cultores.

## §. IV.

Sed ne dubitandi locus supersit, ipsosmet Poëtæ  
A 3 nostros

d) *OLAUS FORMIUS* in append. Lit. Run. hoc ipsum testatur, dicens: Poëtæ veteres, quos Scaldros & Runas vocabant, eo loco apud Reges & Principes antiquitus fuisse, quo jam Consilarii Litenti, alique prudentia & rerum usu præstantes: Idque ex eo patet, quod ab his aureos annulos, arma deaurata, vestes pretiosas & alia magnifica dona, ac imprimis eorum amicitiam ac favorem meruerint. e) In *MARULLEUM* Poëtam iniquior quidem fuit *ATTILAS*, sed id non tam odio artis, quam adulationis. Hic enim, quum *PADUA* in laudes Regis orationem recitasset, & *ATTILAS* per interpreter inaudivisset, se a Poëta Deum & Diis genitum appellatum fuisse, *MARULLUM* una cum versibus comburendum iussit. Sed ne alios a canendis laudibus ejus absterret, visa pepercit. Vid. *CALLIMACHI EXPERIENTIS* visa *ATTILAE*.

nostros pro semet testimonium dicturos adferemus, idque ea lege & methodo, ut post brevem vitæ factorumque enarrationem, nonnulla speciminis loco proponam carmina, quæ de eorundem vena & ingenio judicandi ansam præbere poterunt. Hunc autem laborem, ut in me susciperem, facile, quem Patriæ meæ debeo, amor & reverentia a me impetravit, præsertim cum ita & imperitorum sequiora judicia facillime convelli, & simul iis, qui Poëtarum nostrorum carmina, jam instar Sibyllæ foliorum dispersa, aliquando colligere voluerint, faciem præferri crediderim. Feci autem id ea brevitate, quam res meæ imperarunt, eaque fide, quam spero Te expecturum. Interea, B. L., qua par est veneratione & officio enixe peto, hæc qualiacunque in meliorem partem interpretari digneris.

#### §. V.

Uti autem seriem temporum, quoad fieri poterit, sequi constitui, ita dum ad antiquiora tempora regredior, eam boreales hæc plagas pervasisse barbariem fateri debeo, ut præter versificatores, qui leonino carmine & inconditis rhythmis vernacula interdum pro genio seculi mixtis cecinere, nulli plane fuerint, qui numericis verba ligaverint. Unicum excipere debeo, SAXONEM GRAMMATICUM <sup>a)</sup>, qui seculo XII. adulto Lun-

---

<sup>a)</sup> De nomine hujus SAXONIS Proprio inter eruditos non convenit. STEPHANUS, Vir eruditissimus, in notis ad Historiam ejus Danicam, cum e Dania generosissima stirpe oriundum, nomineque SAXONIS proprio, & ante & post ea tempora Dani usurpato, insignitum fuisse contendit. JOHANNES vero MAGNUS GOTHUS Arch. Episcop. Ups. e contra illud nomen gentilitium vel a Patria inditum fuisse postulat, JO-

Lundensî præfûli Absaloni a manu & secretis, & eo respectu quodammodo noster fuit b). Hic enim, quod mirari convenit, e. spississimis & plus quam cimmeriis ævi sui tenebris ea felicitate emerfit, ut sive æquabilem masculamque stili soluti gravitatem, sive venæ Poëticæ svave ac facundum cum facilitate & puritate flumen spectemus; facile diceremus, non barbaro ævo, verum felicioribus istis seculis, ipsisque adeo Musis obstetricantibus, sua in lucem edidisse vatem nostrum. Quod dilucide evincit, quæ adhuc superest, Historia ejus Danica, majori elegantia, quam fide conscripta, ubi passim interspersa videbis carmina, suo sane auctore dignissima. En! ipsum E. G. Latino carmine. HIARNII Epitaphium, quò diadema Danicum promeruit, red-dentem c):

*Frotho.*

HANNEMQUE de SAXONIA adpellat. Nos autem uti hanc controversiam nostram non facimus; im breviter, quod in rem nostram est, observamus, JOH. MAGNUM non invidia ductum statuisse GRAMMATICUM gente fuisse SAXONEM, cum paulo ante eum HENRICUS CORNELIUS AGRIPPA (natus enim fuit Colon. 1486. mort. Lugd. 1534.) Epist. I. Lib. V. æque ac IRENICIUS in hist. p. 17, quem citat JOHANNES MAGNIUS, cum adpellet JOHANNEM GRAMMATICUM, Saxoniensem Historiographum; ejus testimonio quantum tribuendum sit, cum hac in controversia id non dum adlatum viderim, eruditio judicandum relinquo. Danum tamen fuisse haud fere dubito, præsertim cum de Dania, ut Patria sua, sæpe loquatur: nec si Saxo fuisset, de suis civibus illa dixisset, qua pag. 145. videntur. b) Non vero Præpositus Roschildensis, ut STEPHANIUS loco supra citato evincere adlaborat. Vid. Annor. SPERLINGII in testamentum ABSALONIS. c) Lib. VI. p. 270.

*Frothonem Dani, quem longum vivere vellent,  
Per sua defunctum vura tulere diu.  
Principis hoc summi tumulatum cespite corpus,  
Æthere sub liquido nuda recondit humus.*

Videbis etiam ibi varii generis carmina alia: Inter  
Lyrica succurrit hæc senectutis defensio d):

*Cedat imbellis vetulo juvenus,  
Et senis crebros veneretur annos,  
In viro forti numerosa nemo  
Tempora culpet.*

*Albices quamquam senio capillus,  
Permanet virrus eadem vetustis,  
Nec senes atas poterit virile  
Carpere pectus.*

Hoc eodem tempore vixit quoque Archi-Episcopus Lundensis ANDREAS SUNONIS, Vir eruditione, jurisprudentia, religione, pietate, & si qua traditionibus habenda sit fides, miraculis venerabilis & clarissimus. Fuit hic magnus eximii SAXONIS Mæcenas, cui & opus suum historicum dedicavit; nobis vero heic eo nomine commemorandus, quod ipse carmine Heroico Hexæmeron descripserit, & de septem Ecclesiæ Sacramentis eruditio metro disseruerit. Quæ quidem ejus opuscula jam desiderantur, sed extitisse tamen olim in Bibliotheca Ecclesiæ Lundensis, e Perillustribus Hvitsfeldii Chronico Episcoporum discimus. Post illos vero longa deinde annorum serie ingenua Poësis sepulta quasi jacebat, donec tandem seculo sexto decimo, literis reviviscentibus, novos sumere spiritus iterum cœpit. Ultimum

d) Lib. VI. p. 117.



rum itaque decennium sec. XVI. initium Poëtarum no-  
stratum Latinorum constituet, quorum agmen ducet.

## CAPUT PRIUS.

### §. I.

ERICUS JACOBI SKINNERUS, Stockholmiensis.  
Phyf. & Eloqu. Prof. Upf. a) & Academiæ suo tempore  
perpetuus Rector. Obiit Stockholmæ A:o MDXCVII.  
Ut ordine hicce primus, ita variis scientiis, & in primis  
Eloquentiæ studio nemini fere secundus erat. Adco enim  
facundus fuit, ut titulo *Ciceronis Suecici* a Germanis vul-  
go insigniretur. Vena etiam Poëtica non vulgari, pro  
ratione seculi, eum instructum fuisse, satis edocet præ-  
ter *Epithalamium* operosum in nuptias Regis JOH. III. &  
Reginæ GUNILÆ BIELKE, *Epitaphium*, quod paulo ante  
mortem, atque adeo in ipso agone sibi tale composuit:

*Hoc tumulo situs est ERICUS, Patre JACORO,*

*Qui Stockholmenſi natus in urbe fuit.*

*Qui bene de studiis puerisque Scholisque mereri*

*Ingenii studuit pro ratione sui.*

*Ille pro multis erit alma Academia testis,*

*Anxia Rectorem, quem vocat ipsa novum;*

*Hunc qui succedes onerosum natus honorem,*

*Consule collega, atque precare Deum;*

*Quisquis es hunc vestitus lapsus qui casibus audis,*

*Hunc simul ex animo panituisse scias.*

*Tu quoque cum lapsus fueris peccata gemisco,*

*Ad Christum fugiens non dubitante fide,*

*Propositumque tenens vitam emendare priorem,*

*Ne dubites venia te reperisse locum.*

B

*Quin*

a) Poëticen etiam professum fuisse contendit Dn. Rolott  
Geval, in de Profess. Acad. Diss. p. 173. Nobiliss. Peringskiöld-  
dio in Tom. II. Monum. Upland. Math. & Eloq. iterum audis,

Nepote ejus, GUSTAVO MAGNO, vota faciens ab eo introducitur:

*Sense ut exsangvem GUSTAVUM Specia Regem,  
Integrit hocce melos:  
Nil habui, postquam cepit primordia Regnum,  
Acrius & melius.  
Nil potius, gravius, moderatius, aequius unquam  
Regia sella tulit.  
Suecicus hic Phœnix surgat redivivus, & illud  
Præstet ubique Gothiæ,  
Iste quod Herculeo subiectis præstitit olim  
Robore, mente, manu.*

En quoque imaginem CHRISTIERNI II. Tyranni satis vivide ab eo depictam!

*Quicquid tentabam, quicquid meditabar, & ore  
Quicquid conabar dicere, sanguis erat.  
Namque tot innocui profundi sanguinis amnes,  
Monstra quot undivagus grandia Pontus habet.  
Ergo graves me Styx facit enumerare dolores,  
Styx fem mortiferis torquet abunde malis.*

Varia alia eaque egregia, sed extemporali vena ut plurimum fusa; supersunt carmina ejus, utpote *Threnologia Dramatica* in æviter nam laudem Regis JOH. III. *Epicedia* in obitum Illustriss. Reginæ GUNILÆ BIELKE, Principis hereditarii Sveciæ, CAROLI PHILIPPI, & JOHANNIS Ducis Ost. Gothiæ. *Adclamatio* ad eundem Ducem pro felici Ducatus auspicio A:o MDCVIII. *Dialogus nuptialis* inter eundem & Principem sponsam MARIAM ELISABETHAM, CAROLI IX. Filiam, MDCXII. *Elegi* in coronationem Regis GUSTAVI ADOLPHI, MDCXVII. nec non *Epigramma* in laudem Viri Celeberrimi, qui nobis proximo loco commemorandus erit.

## §. III.

JOHANNES THEODOR. MESSENIUS, Vadstenensis.  
 Nat. A:o Ch. MDCXXXI. Philosophiæ Doct. & Poëta  
 Cæsareus. Juris & Polit. in Acad. Ups. primum Prof.  
 a) deinde Dicafterii Regii Stockholm. MDCXIV. d. xix.  
 M. j. Adfessor, quo etiam tempore Regiæ Cancellariæ,  
 seu Archivi Regni acta secretiora suæ fidei concedita  
 habuit, atque ab interitu insigniter vindicavit, uti com-  
 probant opera ipsius plurima lectu dignissima. *Poëseos*  
 cum *Suecana*, tum in primis *Latina* non fuit ignarus,  
 quemadmodum declarant *Epigrammata*, singulis *Scon-*  
*dia Illustrata* Tomis præfixa, & etiam ceteris scriptis in-  
 spersa varia alius argumenti alia. Succurrit quod in fu-  
 nus Dr. MARTINI BRENNERI, Pastoris in Ecclesia Va-  
 sana Bothniæ Orientalis, conscripsit *Epicedium*, elegans  
 certe & concinnum: Id autem ita orditur:

Horri-

a) In alijs tamen Acad. Upsal. a M. MARTINO ERICI  
 GESTRINIO, *Mathem. Inf. Prof.* aut alio fere *συγγενος*, E-  
 loqui, & Poës PROF. sed forte minus accurate, adpellatur:  
 In diplomate enim Regio, quo M. JONAS COLUMBUS  
 Westmannus, *Poëseos* & *Musices* Professor constituitur,  
 primus vocatur, cui hac Sparta contigerit. Hic dein-  
 de in cathedra Poëtica successores habuit M. AND. GYL-  
 LE, GYLDENKLOU, Ost-Goth. MDCXXXI. M. LAUREN-  
 TIUM FORNELIUM Ost-Goth. MDCXXXV. M. JO-  
 HANNEM COLUMBUM Westm. MDCLXXXIII. M. PETRUM  
 LAGERLÖFVIUM Vermland, MDLXXXIV. M. HEMMINGUM  
 FORELIUM Ost-Goth. MDCLXXXVII. M. PETRUM SCHYLL-  
 BERG V. Goth. MDCCXI. M. MATTH. ASP. O. Goth. MDCCXXIX.  
 M. MAGN. BERONIUM Uplandum MDCCXXXII. & M. JOH.  
 IHRE O. Goth. MDCCXXXVII.

*Horrida jura canam, dirum quoque mortis acerba  
Imperium, tristes funde Thalia sonos:  
Bothnia, qua rucilo Phæbi protensa sub orsum  
Climate, bis binis urbibus illa micat.  
Itemque Carlepolis GUSTAVI condita jussu,  
Qui modo Specorum fulgida sceptrum gerit.*

Varia fuere alias eximii hujus MESSENI fata: Admodum juvenis, Parentibus insciis vel invitis, per Pontificios furtim ablatum, in Germania, Polonia & Italia per XVI. annos literarum coluit studia. Tum demum in Patriam reversus, munia, quæ supra memoravimus, obivit. Tandem autem clandestini cum Polonis, regni tum hostibus, Pontificiis item & Jesuitis commercii literarii convictus, ex sententia judicii Regii in carcerem condemnatur perpetuum *Cajaneburgi* in Bothnia Orientali, ubi tamen mortuus non est, sicuti perperam refert Auct. Svec. Lit. p. 85. sed inde liberatus, cum reditum in Patriam moliretur, obiit sub itinere *Uthloburgi* A:o MDCXXXVI. ætatis suæ anno LVII, ubi etiam in templo urbico sepultus jacet. Vid. Biblioth. Sv. Goth. STIERNMANNI p. 127. seqq. JOSEPH. THUN in *vita Palmstiöldiana* p. 54. & ipsummet Tom. X. Scondiæ Illustr. p. 41. seqq.

## §. IV.

JOHANNES OL. DALEKARLUS, Prom. Mag. Upf. MDCXXV. Nobilis STIERNHÖK dictus. Primum Lect. Pol. & Histor. Gymn. Arof., dein Prof. Juris Acad. Aboensis, & Assessor Dicasterii ibidem, tandem Secretarius Regius & Adfessor Collegii Revisionum, postremo Consiliarius Aulæ Regiæ, Nat. d. xxvii. Febr. A:o MDXCVI. Denat. d. xxv. Junii A:o MDCLXXV. Ut in aliis, ita & in Poëti eximius erat, si fides habenda VIDEKINDO, qui vitam ejus carmine elegiaco conscripsit, ubi inter alia:

*Seu numeris solvenda suis, seu verba liganda,  
Tu fueras gemino promptus in eloquio.*

Memorat etiam Celeberr. STIERNMAN in Tom. II. p. 538. Biblioth. Sv. Goth. *Epicedium*, quo manibus *Erii Petri Drivii*, qui in Hollandia in flumine Gouda, submersus obiit, parentavit.

§. V.

LAURENTIUS OL. WALLIUS Nericius. Nat. A:o MDXCVIII. d. xiv. Aug. Denat. A:o MDCXXXVIII. d. xxiii. Junii. Philos. Mag. & Doct. Theol. Primum Rector Schol. Stregn. inde concionator aulicus Regius, hinc constitutus A:o MDCXIX. Past. prim. Holm. A:o MDCXXI. d. xxvii. Febr. deinde Theol. Prof. prim. Ups. & Pastor utriusque Ecclesiae, postremum Episcopus factus est Stregneliae A:o MDCXXXVIII. d. xii. Febr. a). Fuit hic Poëta Latinus non contemnendus, quod luculenter testatur, præter alia carmina passim occurrentia, *Pentamissuum lugubrium* Carmine Sapphico, ad imitationem capitum quinque threnorum Jeremias, in obitum & Sepulturam Regis GUSTAVI ADOLPHI. In conscribendis *Elegis* nec infelicem eum operam navasse, facile probabunt versus, quibus salutem & consolationem Reginae MARIE ELEONORÆ, casum luctuosissimum Regis & Mariti GUSTAVI ADOLPHI desolenti, ita adprecatur :

*Quis.*

a) Minus accurate imque perhibent Doct. SPEGEL in *Chronic. Episcoporum* p. 333. & Nob. PERINGSKIÖLDIUS in *Monum. Ulleråkr. Tom. II. p. 200. eum A:o MDCXL. Episcop. Stregn. constitutum fuisse, cum MDCXXXVIII. vita defunctus sit. Liberi ejus equestres meruere ordines, diuque WALLENSTEDT. Vid. STIERNM. Bibl. Sv. Goth. T. II. p. 301. seq. & MÖLLERI HYPOMNEM. p. 386.*

*Quis Regina tuas jam consolabitur? imo*  
*Quis potius est lacrimas sistere, quaso, meas?*  
*Heu cecidit, cecidit, cecidit! GUSTAVUS ADOLPHUS*  
*Cordis Regina pars bona nempe Suæ!*  
*Quid magis? Illustris Specorum gloria regni, &*  
*Telluris Patriæ sola columna jacet!*  
*Ille dies nobis infelicissima Sueciæ,*  
*Atque iterum infelix ille Novembrius erat.*

## §. VI.

ERICUS HAQVINI ODHELIUS, V. Gothus. The-  
 ol. Prof. Ups. MDCLII. d. vii. Febr. Dein Past. Prim.  
 Stockholm. A:o MDCLV. d. xvi. Junii. Defunctus  
 Hamburgi MDCLXVI. d. xxxi. Julii. Poëta Latinus  
 non infelix erat. *Epitaphium*, quod ipse sibi confecit,  
 & adhuc spectatur in Basilica Ups., columnæ, quæ pro-  
 xime adstat conditorio Regis GUSTAVI I:mi, adpensum,  
 de vena ejus fluida verissimum fert testimonium. Id  
 autem tale est:

*Tui, quamque Deus metam mihi fixit, adivi;*  
*Vixi, nunc jaceo vermibus esca meis.*  
*Dum vixi, primis studui constanter ab annis*  
*Scrutari sanctos nocte dieque libros.*  
*Quicquid in hac patria, peregrinis quidquid in oris*  
*Discere conabar, pagina sacra fuit.*  
*Qua didici, docui sine fuce, cetera dicant,*  
*Qui, mea quid promisit lingua manusque, sciunt.*  
*Tres & quadraginta mihi sunt circiter anni,*  
*Cum Deus e fragili me statione vocat.*  
*Jam quoque sunt anni bis bini lustraque quadnor,*  
*Incepi postquam munus obire sacrum,*

*Ex his bis senos oracula sacra professus  
Upsalia \*) Terras, Teuto, reviso tuas.  
Vis cogit morbi: Frustra mihi Manus & ingens  
Hinc petitur Rhenus Castiacusque latex.  
Non hic ars, non limpha juvat; Divina voluntas  
Sic fert, debilius sentio redire domum.  
Deficio; Hamburgi morior victurus, habetque  
Hac patrio tellus ossa sepulta solo.*

\*) Haftenus ipse ante extremam profectionem in Germaniam: cetera post mortem ejus addidit MART. BRUNNERUS, tum temporis Græcæ L. Prof. postea Theol. D. & Prof. Upsal. celeberrimus.

#### §. VII.

JOHANNES JOH. PRYTZ Ost. Goth. Consul Justitiæ Stockholm. Inter alia Poëmata laude non defraudanda scripsit *Naniam* ligatam in obitum Principis hereditarii CAROLI PHILIPPI A:o MDCXXII. cujus initium est:

*Eheu! quis largo tabescere lumina fletu,  
Lugubrique dabit fronte rigare genas.  
Lugete O Speei, quondam sub Principis alis  
Hic illic urbes quas coluisse juvat.  
Vos vos cultores durive virentis agelli,  
Mortali cassum luce dolete Ducem.*

NICOLAUS JOH. PRYTZ oratione etiam quadam Vittebergæ Anno MDCVIII. Angelorum officia carmine Heroico concinne decantavit a).

#### §. VIII.

ERICUS OLAI LINDEMAN Skeningia-Ost. Gothus. Nat. d. xi. Febr. MDCXXXIV. Denat. d. xi. Junii MDCXC. Secretar. Reg. Nobilitatus nomine *LINDSCHILD*

a) *Vid. STIERNM. Biblioth. Sp. Goth. Tom. II. p. 152.*

SCHTOLD MDCLXVIII. Aulæ Confiliarius MDCLXXIV.  
 Confiliarius Cancellariæ MDCLXXVII. Cancellarius  
 Aulæ MDCLXXX. Præses Regiæ Revisionis MDCLXXXV.  
 Senator Regni, Comes & Acad. Carolinæ Cancellarius  
 MDCLXXXVII. Gubernator Principis hereditarii CA-  
 ROLI XII. MDCLXXXVIII. πολυμαθής, a) si quis alius.  
 Variis etiam Poëmatibus Latinis, iisque perquam egre-  
 giis, omnium Doctorum meruit adplausum. Ut autem  
 leonem B. L. agnoscat ex ungue, unicum ex ingenti  
 numero adferam, quo expeditionem gloriosam Regis  
 CAROLI GUSTAVI, mare Balticum glacie constrictum  
 cum toto exercitu omnique belli adparatu mense Janu-  
 ario A:o MDCLVIII, transeuntis, exponit:

Marte satos Svecos præsci sensere Gothosque,  
 Traditur & Ærea Mars habitasse lares.  
 Quo non arma tulit pugnae septentrio? Quis non  
 Incubuit mundi gens animosa plagis?  
 Crebrius inprimis vicino cardine moti  
 Ivarum nimbi detonuere graves:  
 Prælia quis nescit vel bellatrix rostra  
 In gremio Baltes in boreaque sinu?  
 Sed superat veteres fors nostra novissima casus:  
 Vidimus hoc ævo bella stupenda magis.  
 Post domitos populos, post regna impleta tropæis,  
 Quâ vagus effusa Vistula mole fuit.  
 Pergebat Cimbras CAROLUS GUSTAVUS ad oras,  
 Utitur ruptam per fera bella fidem:  
 Jamque rates Pelago vestigia castra parabat,  
 Allatura moram frigora sola timens:

C

Fie

a) Eo nomine a SCHEFF, in Sv. Lit. p. 222. & VITTE-  
 NIO Tom. II. Diar. Biograph. p. 179. 180. nec non dedicatione  
 Tom. I. multis celebratur. Designatus etiam erat Eloquentiæ  
 Prof. Upsal. MDCLXVII. d. 26. Junii, quod tamen munus  
 non adiit.



Fit compos voti Rex per contraria votis,  
 Dum fuit in nostris partibus acris hiems;  
 Sidere praelido mox Arctos inhorruit omnis,  
 Atque in crustatas consolidavit aquas.  
 Vertitur in Pontem Pontus, laquearque fit aquon,  
 Inque soli speciem cogitur omne salum.  
 Persultant aciem florentes are caterva,  
 Arctosque acies marmora salsa ferunt:  
 Magnanimus latus ducat Rex ipse cohortes,  
 Insolitumque suis per freta monstrat iter.  
 Antea cornipedum fixos terit ungula fluctus,  
 Per vitreos campos agmina cana meant.  
 Si gessit triplici praeordia juncta metallo,  
 Qui docuit primus carula ferre ratem;  
 Pectora qua fuerint, quamquam impavidissima nostris,  
 Qui nulla calcans aquora strata trabe!  
 Non vos, Isacides, divina potentia solos,  
 Nos quoque praesenti nobilitavit ope:  
 Illinc seu gemini, sublimia flumina, muri  
 Erecta, & sicco sunt vada castra pede.  
 Pensilis hinc fornix & pons cristallinus undae  
 Induit; insuetum his imposuitque jugum;  
 Neutri fluxa fides elementis, concita neutris  
 Neptuni movit turbine bilis aquas.  
 Utraque gens victis illustrior hostibus egit,  
 Utraque gens terris ditibus aucta fuit.  
 Quare, cur similes referant miracula casus?  
 Utraque gens vixit est, utraque causa, Deo.  
 Nec his inferiora sunt disticha in omnes Reges Sve-  
 ciae a GUST. I. ad CAROL. XI, concinnata; de hoc  
 autem ultimo hunc in modum:  
 Bella gerit, vincit, revocat bona publica, sarcis  
 Damna, fovet plebem militiaeque faver.  
 In silentio praetereamus cetera ejus scripta Poëti-  
 ca,

ca, utpote *Epitaphia*: In manes Principis heredit. Sveciæ CAROLI GUSTAVI recens nati; Campi Marefchalli SIM. HELMFELDII & Generosiff. Adolescentis GUSTAVI BONDE. *Epithalamia*: In nuptias Dni JACOBI LILJEHÖK & BRIGITTÆ KRUS, quod *Militia Mariæ & Cupidinis* inscribitur, & Prof. Upsal. PETRI LAGERLÖFVII cum virgine Nobiliff. ELISAB. BROMAN: *Litteræ* etjam ad Secret. Status, Dn. LAURENT. WALLENSTEDT, dum Comes atque Senator Regni crearetur, iteratis vicibus. Singula prorsus egregia & acuminis plenissima.

## §. IX.

JOHANNES BERGH Lib. Bar. BERGENHIELM Ost-Gothus a) Nat. MDCXXIX. d. 24. Junii. Obiit MDCCIV. d. 2. Nov. Historiarum primum Prof. hujus Lycæi MDCLXI. Dein in Cancellaria Regia Protocolli Secretarius MDCLXV. Post Consiliarius Aulicus, demum Cancellariæ & Status Secretarius, tandem aulæ Consiliarius MDCXCIII. & legationis solemniss in Muscoviam caput. Hujus in *Poësi* labores eximios si taceremus, - negligentia sane nota nobis maximo jure inureretur, cum, quæ scripsit carmina, elegantissima sint, Illustriusque auctoris fama & eruditione digna. Qui autem brevitate sectari cogimur, unum tantummodo carmen, quo factum illud admirabile CAROLI X, quod LINDSCHJÖLDIUM nuper celebrantem audivimus, trajectum nempe maris Baltici glacie constricti, canit, in præsentia adferemus: ut ita Illustre hoc amicorum & *Patriæ* par, quemadmodum in vita sæpe invicem carmine se exercuerat b), nunc quoque committatur:

C 2

*Semidecos*

a) Inscriptus albo Nationis Ost-Gothicae MDCXLV. b) Manibus nostris etjamnum seruntur carmina LINDSCHJÖLDII & BERGENHIELMII, de itinere Staffundam suscipienda, utnt

*Semideos quid Roma tuos, quid Graja vetustor  
Laurigeros iactas, nomina magna, duces?  
Major in Arctoo consurgit gloria mundo,  
Subque Lycaonio fidere vincit bonos.  
Rex Sveonum CAROLUS GUSTAVUS, vindice ferro  
Hostes prostruens, aquora transit eques.  
Admittunt placide Regem Neprunia Regna,  
Villoremque super Cimbrica vineta Thetys:  
Successus tantos veniens mirabitur etas,  
Nec facile inveniet transitus iste fidem.  
Calcarunt fluvios alii, mare sternitur illi;  
Talis hyperboreo laurea digna Duce.  
Esse DEO carum quis posthac ambiget illum,  
Natura illustrat quem famulantis opus?*

In abdicationem etjam Reginae CHRISTINÆ, utut breviter, non tamen invenisse:

*Hactenus has tenuit sedes animosa Leona,  
Nunc Leo magnanimus sed loca cessa tenet.*

*Epigrammatic quoque, quorum aliqua adposita sunt  
Iconibus pertinentibus vel ad Historiam Glor. M. Regis  
CAROLI GUST. vel ad Speciem novam & antiquam Illustrissimi Comititis DAHLBERGII, teste Holm. lit. p. 88,  
luculentam suam declaravit venam.*

S. X.

LAURENTIUS JONÆ FORNELIUS. Ost-Gothus. Pro-  
mo-

*extemporanea, sale tamen refertissima. In uno illorum BER-  
GENHIELMIUM per jocum carpit LINDSKIÖLDIUS, quod  
primam in gloria contra metri leges corripuerit, quod ita  
excusat noster:*

*Non errore aliquo factum est, ceu cerno notatum,  
Quod vobis longa est gloria, nostra brevis:  
Sic visum est superis, quibus ut certare minores,  
Præsumant vanum est: sint rata iussa Deum.*

motus Mag. Lugd. Batavorum MDCXXXIX. Bibliothecarius Regius MDCXXXIV. Poëta Prof. Upf. MDCXXXV. d. V. Nov. & P. st. in Vet. Upf. MDCXLVI. d. VII. Febr. obiit MDCLXXIII. d. VIII. Julii. Elegans fuit Poëta Latinus, quemadmodum fidem faciunt varia ejus carmina passim occurrentia. Quod ne gratis dixisse videar, audiamus solummodo versus, qui us Horologium suum Astrologicum Upsaliense, a Dn. Doctore OLAO WALLIO tantopere laudatum, a) orditur:

*Astrorum positus, solis calique meatus  
Stellarumque vices, & nexos orbibus orbes,  
Innumeros cali numeros, & conscia sati  
Sidera, & abstrusi fatales sideris ignes,  
Immensaque Poli lustrare volubilis oras &c.  
Hic canere incipiam. Cali mihi summa potestas  
Adspice, nostris facilem det versibus auram.*

In saxo etiam sepulchrali, quod in templo Upsaliæ veteris habet, hos sibi posuit versus notatu dignos:

*Gothia me genuit, Batavi fecere Magistrum,*

*Upsalia excepit, Porticus hac sepelit.*

*Me melius nemo GUSTAVI vulnera regia*

*Vidit, id in saxo hoc Lector habeto novum.*

Scientes omittimus Panegyricum, quem in sacræ

C 3

Poëstos

a) Contulerat Doct. OL. WALLIUS Horologium hoc Upsaliense FORNELII cum Argentoratensi Celeb. FRISCHLINI, quocirca in hac erupit verba: Hac metra citra affectum lætæ genti, lætæque conferenti, incertum erit & difficile adfirmare, uter horum palmam in scribendo carmine alteri præripuerit, & alterum superaverit: Nisi adscripta fuissent, & Lector videret horum versuum auctorum FRISCHLINI & FORNELII nomina, nescire habebis, sat scio, Lector necessum, uter horum hujus, uter illius carminis auctor vid. Scheff. Svec. Lit. p. 141.

Poëseos studium adhuc juvenis edidit, in quo omnes literas Alphabeti pertransit illo modo, ut quævis dictio primorum versuum a lit. A, incipiat, sequentium a ceteris deinceps ad finem usque Alphabeti. Recensentur alia poemata ejus varia a CEL. SCHEFFERO l. c. p. 141. & Ampliſſ. STIERNMANNO in Biblioth. Sv-Goth. Tom. II. p. 472 seq. Filium etiam noster habuit JOHANNAM FORNELIUM, Mathes. Prof. Upsal. Poëseos latinæ pariter non ignarum.

## §. XI.

JOHANNES VIDEKINDI Vestmannus. Lector primum Gymn. Stockholm., postea Historiographus Regius. Locum inter Poëtas Latinos non infimum meruit, uti inter alia testatur *Elegia* conscripta in laudem *Rustica vite*, cujus initum est:

*Aula vale, satis es largita, satisque negasti,  
Et mihi cara satis, nec satius, Aula vale t  
Ruricola salвете Lares, salвете penates,  
Quos cali & terra gloria major habet.  
Vos colitis Divum sedes, Vos regna Napæ,  
Qua fortunatus Pan Dryadesque tenent.  
Hic Te, Faune, doli, nec mille pericla saluti  
Terrent, sed stabilem dant pia vota fidem.  
Nullum hic trepidus turbaris voce vocantis,  
Libera sed vite dividis æsta tua.*

Nec laude sua defraudanda sunt cetera ejus scripta Poëtica: In Tuguriolum suum *Menhammar*, insulæ Ekeröensis, *elegi*: In obitum JOHANNIS STIERNHÖKII, nec non conjugis ejusdem HELENÆ BEJER: In manes Rever. Episcopi JOAN. ELAI TERSERI. *Epithalamia* etiam in connubium Bar. JOH. SKYTTE & Nobiliss. Virg. BEATÆ LILJE, pariter ac *Inspectoris* Argentifodinz Salensis JOH. PETRI & virg. BRIGITTÆ SPÅK, aliaque perplurima.

## §. XI.

## §. XII.

EMUNDUS NICOLAI FIGRELIUS Ost-Gothus <sup>a)</sup>  
 Histor. Prof. Upſ. MDCL d. XIV. sept. Dein Secre-  
 tar. Regius, & Informator heredit. Principis CAROL.  
 XI. simulq; nobilitatus, nomine GRIPENHIELM, MDCLX.  
 Baro MDCLXXIII. Regni tandem Senator, & Aulæ  
 Reg. Cancellarius. Obiit MDCLXXVI. Poëſin Latinam  
 felici Minerva exercuit, quemadmodum fidem faciunt  
 hic illic obvia carmina ejus; ex quibus unum specimi-  
 nis loco producimus, quo trigæ fratrum, Baronibus  
 AXELIO, BENEDICTO & JOHANNI ROSENHANIIS,  
 nec non Dn. JOH. TUNDEL, auspiciſſimos CARO-  
 LI XI, Sueciæ tum hered. principis, natales oratio-  
 nibus publice in Acad. Upſalienti celebrantibus, gra-  
 tulatus eſt.

*Dum Rex Sarmaticum Magnus fert arma per orbem  
 CAROLUS, & rupti fœderis ultor abeſt;  
 Dum lauros, dum longinquo petit axe triumphos,  
 Et Gothico viſum Viſula Marte gemit;  
 Suecia grata Deo tellus, pars inclita mundi,  
 Quo ſimul exſultet, reperit ecce domi,  
 Magna oritur Regum Suboles, hæresque paterni  
 Nominis, in cunio CAROLUS ultor adeſt.  
 Jamque anguſta domus, ſceptrumque Aquilonis & alma  
 Exſultat gemino iuxta Leone quies.  
 Sic in noſtra novo Mars & Lucina favore  
 Commoſa conſpirant, hæc domi & ille foris.  
 Temperat ille enſes, hoſtique inneſſit habenas;  
 Facem e purpureo porrigit illa ſinu.*

Prætor

<sup>a)</sup> Ost-Gothum ſe dicebas, etiamſi Schedviæ Feſt-Gor-  
 thorum d. 24 Martii MDCXXII natus eſſet, Patre illinc tunc  
 Ludimagiſtro: ratio forte fuit, quod Schedvia olim perſtinue-  
 rit ad Diœceſin Lincopenſem.

Præter hæc enumerat Celeb. SCHEFFERUS in Sv. Lit. p. 176. *Diagramma Epicum*, de ultimo mundi die & vita æterna, ad Comitem GUSTAVUM BANERIIUM, quem in itinere apud externos comitabatur: *Epitaphium Elegiacum* in funus illustriss. Comitis JACOBI DE LA GARDIE, Regni Sveciæ Archistrategi. Quibus accedit *carmen gratulatorium* adjunctum Parentationi, Illustrissimis manibus Herois CAROLI CAROLI GYLDENHIELMII consecratæ, elegans sane & argutum. Edidit idem etiam librum singularem de *Statu Illustrum Romanorum*, qui exteris magno in pretio habetur; (teste Möllero ad nomen ejus in Hypomn. ad Sv. Lit. 400) & locum in Thesauro Græviano summo jure meruisset. a) §. XIII.

ANDREAS LILJEHÖK Lib. Bar. in Nerpis. Ost-Gothiæ Gubernator, & simul Legatus Sveciæ ad Aulam Polonicam. Mortuus d. XVI. Nov. MDCLXXXV. Insigni & mirabili versus fundendi excelluit facultate, quemadmodum *Venus* ejus Gothica, seu carmen gratulatorium in nuptias Regis CAROLI GUSTAVI & HEDVIGIS, Principis Holstatiæ, nec non, quos fudit, *Elegi* in laudem virtutis heroicæ CAROLI XI, liquide ostendunt. Elegans quoq; est & tersissimum *Epos* ejus gratulatorium in librum de *Statu Illustrum Rom.* EMUNDI FIGRELII, ex quo hoc solum delibabimus:

*Illustres anima, quas Dis contermina virtus.*

*Extulit, & cello siculi aquavit Olympo:*

*Dum vos æterni metas pertexitis ævi,*

*Nec vos fam manent sævis obnoxia Parcis,*

*Sive per Elysium vobis reptare salubrum,*

*Seu Phlegetontiacas alnis tranare paludes,*

*Seu superas habitare domos contingit, & astra; Cere-*

a) Falsa penitus sunt, quæ de nostro tradit N. H. GUINDLINGIUS in Disc. sup. statibus Europæ P. II. p. 346. ut vel ex iis, quæ hæc breviter dicta sunt, patet.

*Cernite calato vestros in marmore vultus,  
Atque Corinthiaco facies spirare metallo.  
Cernite! nam vestra fuit hic non ultimus olim  
Virtuti decretus honor; dum Martia vincto  
Hoste triumphali capitolia scandere curru,  
Et pulcrum Clariâ frontem velare corona,  
Seu licuit gestare togas & pacis Olivam  
Felici trahere manu.*

## §. XIV.

THOMAS POLUS. Nat. Revaliz Patre TIMO-  
THEO POLO, Poëta Laureato & Poëseos ibidem Pro-  
fessore. Post varias legationes & alia munera ad Senato-  
riam tandem evehctus est dignitatem, addito simul Co-  
mitis titulo & insignibus. Quantum etiam ei diva de-  
beat Poësis, facile animadvertet, qui monumenta fe-  
licissimi ejus ingenii pensitaverit. Ut cetera taceam,  
carmen ejus Geniali Thoro Regis CAROLI XI. & Re-  
ginæ UDALRICÆ ELEONORÆ sacratum, eum inter  
Poëtas primæ magnitudinis non immerito referri debe-  
re, satis confirmat: En auspicantem:

*Dum plausus inter, pacataque júbila mundi,  
Festis collucet Borealis Regia radiis,  
Quas ingens accendit Hymen; dum festa parantur  
Festibus, & cuncti thalami cumulantur honores  
Ducturo ULRICAM CAROLO; non undique tantum  
Mortales hominum concurrere credite cæcis:  
Numina virtutum calo delapsa sereno  
Adspicio vates. Adstant genialibus aris  
Divarum excelsa species; Pietasque fidesque,  
Justitia, & nullis constantia finibus  
Ad fulmineis Virtus Mavortia telis;*



*Qua, quoniam CAROLO mentem finxere Sorores,  
Nunc alacres adsunt, Caro ut grantetur Alumno  
Virginis AUGUSTÆ amplexus.*

Oda etjam Alcacia in Doctoratum Profess. Pernav.  
apud Livonos GEORGII PREUSII omni honore nomen  
ejus gerit, ut mittamus varia varii generis *Epigramma-  
ta* a), quibus insignis fuit.

## §. XV.

JOHANNES PAULINUS OLIVENCRAINTZ. Fi-  
lius A. Episcop. Ups. Doct. LAURENT. PAULINI GO-  
THI. Cancellariæ primum fuit Regiæ Actuarius MDCLVI.  
Dein Secretarius plurimarum legationum. Hinc Secre-  
tarius Revisionis MDCLXII. Porro Secretarius Status  
& Cancellariæ Consiliarius. Postea MDCLXXVI Le-  
gatus extraordinarius ad tractatus pacis Neo-Magenlis,  
CHRISTINÆ demum Svecorum quondam Regiæ Consilia-  
rius & Dominiorum Generalis Gubernator b). A foro  
Poëtico eo minus arcendus, quo certius est eum cau-  
sam suam ibi omnium adplausu egisse, & *Venusino Ore*  
jucundissime cecinisse. Oda ejus dicata sacro solenni Re-  
giæ Unctionis Serenissimi & Potentissimi Principis Dni  
CAROLI XII. locuples hujus rei testis est: cujus ini-  
tium

*Cur veste nigra, funeris indice,*

*Mic inquinatur latitia dies,*

*Qui postest augustos honores,*

*In Patria bona destinatus?*

*En tellus, terram, cunctaque restans*

*Nix alba vestis, lumine dandido:*

*En ipse pulcro Rex renidet*

*Ore, sibi que bonum referri*

*Exspe-*

a) Teste von der Harde in Holm. Lit. p. 38. b) Vid.  
Idem p. 29. 30.

*Exspectat omen. Promite serio  
 Grati favoris verba volentia;  
 Omnesque Regalem coronam  
 Auspiciis honorate faustis.  
 Ille cingat apte tempora Principis  
 Lauri ac oliva florida virgula,  
 Per Martis aque ac Pacis artes  
 Ad memores celebris nepotes.*

Multas præterea Odas, Epigrammata & alia carmina conscripsit, quæ partim edita sunt, partim adhuc in MSS. latent, universa autem prorsus egregia & multo sale conspersa c).

## §. XVI.

JOHANNES JONÆ COLUMBUS. Vestmannus. Poët. primum Extraord. dein Ord. Prof. Ups. MDCLXXI. mortuus MDCLXXXIV. Omnium confessione Poëta Latinus, si quis alius, suavissimus fuit, quem Sv:Gothia nostra summo jure aliis cujusvis gentis, tam antiquioribus, quam recentioribus opponere potest. Adeo etiam impiger, ut nullam prætermiserit occasionem, quin aliqua depromserit, eaque, quamvis interdum extemporanea, Musis tamen & Apolline multo plena. a) Ut dulcedinem ejus degustemus, carmen votivum Epicum in natalem Reginæ UDALRICÆ ELEONORÆ d. xvi. MDCLXXXII decantatum, intuebimur, quod inter alia hæc habet:

D 2

Jam

c) *Vid. Holm. Lit. p. 30.* a) *Plura vir hic Celebrissimus in lucem publicam edidit, quam quibus enumerandis charta sufficiat. Salivam erudito orbi primum movit pul-*

*Jam siccus amotos rubigine deterat enses:  
 Machinaque utilibus Mavortia cedat aratri,  
 Confles, & ignivoma mutet fornace recolla  
 Dura faber ferris curvisque ligonibus arma.  
 Parcite mortales, (ita pax mitissima fari  
 Fertur, ut ad medios vittatam tendit olivam)  
 Parcite tot furii animos stimulare nocentes,  
 Abstulerant vobis nimium vindicta dolorque  
 Sanguinis, & tetrica tenet omnia mortis imago.  
 Quo tantam lucem rationis & ignea celi  
 Semina, consilii tantas in pectore vires;  
 Si tamen ambiguus vitam rapit impetus omnem,  
 Juraque dispensat gladius & robore Mavors?  
 Stringite, si certum est vi cernere, ruris in hostes,  
 Inque feras ferrum, quæ vos populantur, & agri  
 Ditiæ o'es rapiunt: homini bonitate fideque  
 Certet homo, societque suas in mutua dextræ  
 Commoda:*

Pater ejus fuit JONAS COLUMBUS, Poëseos et-  
 jam Prof. Upf., cujus Poëmatum non nisi exiguas vi-  
 dere licuit reliquias, sed eas non invenustas. Fratrem  
 etjam habuit SAMUELEM COLUMBUM, nativum illum  
 & percelebrem Poëtam utriusque linguæ, adeo ut verum  
 esse pateat, quod alicubi *b)* tradit Celeberr. MART.  
 BRUNNERUS divinam Poësin gentile COLUMBORUM  
 bonum fuisse.

#### S. XVII.

PETRUS LAGERLÖF Vermelandus. Log. & Me-  
 taph. Prof. Upf. MDCLXXXII. Poës. MDCLXXXVII.  
 item Elog. MDCLXXXVII d. xxx. April. simulque Hi-  
 storiographus Regius MDCXCVIII. Obiit MDCXCIX  
 d. vii. Jan. Dignissimus hic utique fuit, qui Eximio va-  
 ti

---

*b) In Programmate ad Orat. ejus in laudem Olcæ.*

ti COLUMBO in cathedra Poëtica succederet. Carmina enim utriusque si contuleris, dubius certe hærebis, cuinam potissimum palmam adjudicare debeas: Erat certe, ut illi, ita huic ingenium, mens diviniore & os magna sonaturum. Ut autem more meo nonnulla, B. L. libanda proponam, adferam felicissimi vatis nostri Elegiam in tumultum Campi-Mareschalli inclutissimi Bar. SIMONIS GRUNDELL HELMFELDII, qui fortiter pugnans in prælio Scanensi occubuit. Ea sane fidem faciet nimium me non dixisse, si Nostrum GROTIUS HEINSIUSque in pangendis versibus multo non fuisse inferiorem affirmavero. Ita vero ibi:

*Credidit huic, hospes, HELMFELDUS ossa sepulcro;*

*Et nomen tantum jam brevis urna capit.*

*Qui post belligera tot fata ac ausa juvenca,*

*Qua poterant laudi sola fuisse satia:*

*Post fere tot titulos, quos vix numeraverat annos,*

*Quos omnes uni debuit ille sibi:*

*Post partam virtute togam decus atque curule;*

*In quo nil proavus diceret esse suum:*

*Devovet emeritam Regi Patriaque stenciam,*

*Et properat satius obuius ire sui:*

*Sustinuitque premi venerandos casside canos,*

*Sub quibus at juvenem, qui decet, ardor erat.*

*Nec procul est ducenda fides; Pars ille thorum,*

*Dum bis vincebas, CAROLE, magna fuit.*

*Invidit terni sensum fortuna triumpho,*

*Cui tamen isse suo sanguine stravit iter:*

*Aut tantum potius columenque decusque triumpho*

*Invidit, per quod laetior ille foret.*

*Sed bene, quod non hac requiescis inultus in urna*

*Et postquam tantum est tibi gloria cinis*

*Ense parentatum est Tibi mox, tibi iusta peregit,  
 Et ferro exequias vindice miles iit.  
 At nobis, si vera loquar, nulla ultio tanti est;  
 Et lucrum vitæ quamlibet hostis habet.  
 Et quid vindictam frustra poscimus, in hoste  
 Jactura nequeat cum locus esse pari.*

## §. XVIII.

JOHANNES BILLBERG. V. Gothus. Mathem. Prof.  
 Upf. MDCLXXIX. Theol. MDCLXXXIX d. v. Oct. &  
 & A:o MDCXCII d. II. Martii. Pastor designatus Ore-  
 broëns. Demum Episc. Stregn. Obiit MDCCXVII. Amæ-  
 num Viro huic Celeberrimo & promptum fuit ingenium,  
 neque minus socco aptum, quam cothurnis. *Lessus* e-  
 nim ejus in Reginam ELEONORAM, quam gravis?  
 Quam elegans etiam ille, quem inferiis consecravit  
 CAROLI XI? Taceo *Epicedia* alia & *Epigrammata* per-  
 plurima, contentus breve illud adponere carmen, quo  
 iter septentrionale CAROLI XI, quo in urbe-Torneo  
 mense Junio MDCXCIV. ex specula solem tota nocte  
 lucentem, curiose observabat, ita celebravit:

*Rex CAROLUS terras, quas Circulus Arcticus ambit,  
 Dum peragrat, proprias atque tuetur opes,  
 Miratur parere suis latissima sceptris,  
 Sol ubi continuo lampade lustrat humum.  
 Hæcenus & nostris hac sensibus invia, Princeps  
 Nullus, ait, Phæbum vidit inocciduum.  
 Substitit in votis Alphonsi gloria: Iberus  
 Cur se perpetuo lumine jactat iners?  
 Sobrietas, sed enim pietas, vigilantia, cura  
 Sufficiunt nobis munera tanta Dei.*

## §. XIX.

OLAUS HERMELIN Vermelandus. Natus Philipstadiæ  
 Patre NIC. HAQUINI SKRAGGE urbis ejus consule;  
 Cognom-

Cognomen autem HERMELIN in prima juventute ad-  
optatum, retinuit nobilitatus A:o MDCCIII. Eluxit  
vero in Viro hoc laudatissimo, immo nostras longe  
superante laudes, ab ipsa statim juventute singularis in  
Poëtica studia propensio, unde etiam ad Eloq. & Poës.  
Professionem in Acad. Livon. Dorpatensi MDCCIII  
vocatus fuit, eamque summo cum adplausu obivit :  
Postea tamen in cathedram Juridicam ibidem transla-  
tus; Inde Historiographus & Secretarius Regius MDCXCIX  
tandem Secretarius status & Cancellariæ Regiæ Consi-  
liarius MDCCV factus. Occubuit demum, uti credi-  
tur, in clade Suecis funesta ad Pultaviam A:o MDCCIX,  
tum demum a latere *Gloriosissimi* REGIS sui avulsus. In  
omni scientiarum genere Vir hic *Illustris* versatissimus  
erat, in Poësin vero tum latinam, tum etiam Sveca-  
nam tanto studio ferebatur, ut inter medios armorum  
strepitus maximamque negotiorum molem, Musis tamen  
vacayerit. Oculis nostris etiamnum obver-  
santur carmina ejus varia occasione fusa, vere terſa &  
ad veterum Poëtarum nitorem adsurgentia. Unicum  
jam siltamus speciminis loco, quod cecinit ad tumu-  
lum *Fortissimorum Equitum Gothicorum*, qui ductu HUM-  
MERHIELMII prope *Dorſiniam* in *Lithuania* hostium  
fraudibus circumventi occubuerunt, quorum corpora,  
cum e duobus tumultis ad viam, Tropæi instar conge-  
ris, erui paulo post jussisset Rex Sveciæ, ut decentius se-  
pelirentur, eodem die magna pars *Oppiduli* fortuito in-  
cendio conſagravit A:o MDCCII d. xxxi Martii :

*Vidit ut immerſos tenui Mars forſe ſepulcro,*

*Sarmatico nuper qui cecidere dolo.*

*Indignatus erat tam forſia corda Gothorum*

*Caraque supremis celebrat dum funera donis,  
 Concept meritas Dorfina sponse facies.  
 Dorfina nempe sibi funesta conscia cladis,  
 Hac voluit flamma triste piare scelus.*  
 In eandem urbem, incendio deinde cura Clementiss. Regis liberatam, hanc quoque fudit *Elegiam*:

*Quam miranda fuit Gothici clementia Regis,  
 Dorfina cessari tempus in omne potest.  
 Illa quod adjuvit sedam temeraria cladem,  
 Centeni nuper qua cecidere viri:  
 In tenues meruit redigi damnata favillas,  
 Ille daret inferias manibus usta piis.  
 Cum caput subito tamen exardescere casu,  
 Stramineasque vorat lucida flamma casas,  
 REX vetat ultorem grassari longius ignem,  
 Cumque facies posset subdere, subdit aquam.*

Plura videri poterunt in *Prodomo Deliciarum Suecorum Poëtarum*, ubi HERMELINI carmina haud pauca comparent, quibus addi a) possent, præter jam recitata, quæ cecinit in CAROLUM XII. Saxonum ad Pultaviam victorem & in EUNDEM de capta *Leopoli*; In *Toruniam* captam; ad *Vabissam* annem de strage Moscorum prope *Hollossin*; In *Ilustriß. Dn. ERICUM LINDSCHLÖLDIUM*, cum *Gubernator CAROLI XII.* renunciatus esset, & alias sæpe; ad *Cardinalem Primatem Poloniæ* varia; de liberatione *Urbis Rixæ*; In nuptias *Prof. PETRI LAGERLÖFVII & ELISAB. BROMAN*, & plura alia. Commemorat etiam *Prof. Hallensis Cel. JUSTUS CHRISTOPHORUS BOEHMER* in *Præf. ad HERMANNI CONRINGII Musæ errantes*, *Elegiam ejusde incommodis circa castris* frad *HORTENSIIUM MAURUM*, magnum illud *Ita-*lorum decus perscriptam, eamque elegantissimam vocat.

CAP. POST.

a) *Demi vero debet, quod in sapim laudato Prodomo p. 28. adparet Epicedium in Manes HEDTIG DELAGARDIE, nupte quod Aulicem agnoscit Præfati. jam Upf. Generosij. D. Bar. JOH. BRAUNERUM.*



VA1 1506437